

Njuolggadusat - Riikkaidgaskasaš boazodoalloguovddáš

Ođasmahttin-, hálldahus- ja girkodepartemeanta mearredii 1.b. suoidnemánus 2010

§ 1 Ulbmil

Riikkaidgaskasaš boazodoalloguovddáš galgá doaibmat nu ahte davvi guovlluid ceavzi boazodoallu seailu ja ovdána, ja galgá rahčat nanosmahttit ovttasbarggu boazodoalli álbmogiid gaskkas. Guovddáš maiddá galgá fuolahit dan ahte boazodoalu árbevirolaš gealbu bisuhuvvo, ja ovddidit máhtu ja ipmárdusa boazodoalu birra.

§ 2 Riikkaidgaskasaš boazodoalloguovddáža doaibma

Riikkaidgaskasaš boazodoalloguovddáš galgá leat fágalaččat iehčanas lágádus.

Guovddáš galgá čohkket dieđuid ja viežžat duođastusaid ja válbmet geahčastaga boazodoalu gullevaš máhtus, ja gaskkostit dieđuid ja dilálašvuodaid main lea mearkkašupmi boazodoalu eavttuide, kultuvrii ja ekologijai, ja maiddá boazodollui guoski dutkanbohtosiid ja árbevirolaš máhtu. Árbevirolaš máhtu galgá duođastit ovttasráđii báikkálaš boazodoallobirrasiguin ja guoskevaš riikkaidgaskasaš njuolggadusaid vuodul. Guovddáš sáhtta fuopmášuhttit áššáigullevaš dutkandárbbuid ja oččodit dutkanásahusaid álggáhit dákkár dutkama.

Boazodoalloguovddáš galgá maiddá addit fágalaš ja hálldahuslaš doarjaga Boazoálbmogiid Máilmmelihttu ja dan riikkaidgaskasaš bargguide.

Boazodoalloguovddáža ulbmiljoavkun leat boazodoallit, almmolaš eiseválddit, dutkan- ja fágabirrasat, eará ealáhusdoallit, searvvit, ovttasbargoorgánat ja muđuid servodagat daid riikkain gos boazodoallu lea.

§ 3 Organiseren

Boazodoalloguovddáš láchčo hálldahusorgánan mas leat iežas fápmudusat.

Ođasmahttin-, hálldahus- ja girkodepartementa mearreda boazodoalloguovddáži njuolggadusaid, gč. maiddá § 8.

Guovddáža jodiha stivra mas leat guhtta lahttu ja njeallje sadjásaš lahttu.

Beaivválaš jodiheaddjis lea ovddasvástádus guovddáža oktilaš doaimmaid ovddas.

§ 4 Stivrra nammadeapmi

Ođasmahttin-, hálldahus- ja girkodepartemeanta vállje stivrra jodiheaddji ja nuppiid stivralahtuid ja várrelahtuid ovttasráđiid Boazoálbmogiid Máilmmelihttuin. Nammadeapmi dahkko árvaluvvon evttohasaid gaska ja lea fámus njeallje jagi, ja ođđa nammadeapmi sáhtta leat vel ovtta áigodahkii. Stivralahtuin galgá leat gealbu ja máhttu boazoealáhusa áššiide ja árbevieruide mat gullet boazodollui.

Romssa Universitehta Árktalaš biologijja Instituhtta, Sámi allaskuvla, Árktalaš universitehta, Norgga Boazosápmelaččaid Riikkasearvi, Boazoálbmogiid Máilmmelihttu, Sámeráđdi, Ruota

Sámiid Riikasearvi, Suoma Boazosámit RS ja Reindeer Herders' Union of Russia bovdjuvvojit buktit evttohasnamaid, guhte-ge dáin evttoha ovta nissona ja ovtta deavddu.

Ođasmahttin-, hálddahus- ja girkodepartementa ja Boazoálbmogiid Máilmmelihttu sáhttet ovttrasáđiid bivdit earáge ášahusaid ja servviid árvalit ja buktit stivralahttoevttohasaid namaid.

§ 5 Stivra

Stivra galgá leat boazodoalloguovddáža bajimus váldin, ja guoddá alimus ovddasvástádusa guovddáža doaimmaid buohta. Das lea geatnegasvuohta bisuhit alladáset áššečehpodaga guovddáža bargguin, ja geahččat bearrái ahte doaimmat fievrriduvvijit spáitilit ja doaibmi njuolggadusaid mielde. Stivra guoddá ovddasvástádusa fágalaš ovddideamis, resursa-golaheamis ja vuoruhemiin, ja dasto stivra galgá válbmet strategiijaid guovddáža doaimmaid váras. Stivra galgá gárvvistit ja ovdanbuktit jahkereketdoalu ja jahkediédáhusa, ja mearredit bušeahtta ja doaibmaplána. Maiddái stivra galgá nammadit ja virgáibidjat beaivválaš jodiheaddji, ja muđui guovddáži bargofámu beaivválaš jodiheaddji evttohusa vuodul.

Jos stivralahttu ii sáhte boahit čeahkkimii, ferte sadjásaš lahttu gohčohallot. Stivra lea mearridangelbbolaš dalle-go čeahkkimis oasálastet unnimustá njeallje lahttu. Jos jienastus šaddá ovttađaset, lea stivrajodiheaddjis duppaljietna.

§ 6 Beaivválaš jodiheaddji

Beaivválaš jodiheaddji fuolaha boazodoalloguovddáža doaimmaid, ja sus lea ovddasvástádus guovddáža siskáldas hámaidahttimis, eavttuid mielde maid stivra mearrida.

Beaivválaš jodiheaddji lea stivrra čalli, galgá ráhkkanahhtit ja árvalit áššiin mat biddjojit stivrra ovdii, ja lea geatnegahtton čadahit stivrra mearrádusaid.

Beaivválaš jodiheaddji vástida ekonomálaš doaimmaid ovddas ja geahčča bearrái ahte dat jodihuvvojit doaibmi njuolggadusaid mielde. Beaivválaš jodiheaddji válbme bušeahttaevttohusa ja jahkereketdoalu, ja čuvge miehtágaskka stivrra ekonomálaš ja eará diliin mat sáhttet leat mearkkašahhtin guovddáža bargguide.

Beaivválaš jodiheaddjis lea bušeahttageavaheami fápmudus ja maiddái váldi dahkat soahpamušaid guovddáža opmodagain, proševttain ja ovttasbargogaskavuodain daid eavttuid vuodul maid stivra mearreda.

Beaivválaš jodiheaddji fuolaha virggiid almmuhemiid ja addá stivrii evttohusa dain.

§ 7 Dieđiheapmi

Boazodoalloguovddáš buktá jahkediédáhusa ja reketdoalu Ođasmahttin-, hálddahus- ja girkodepartementii. Dávkileabbot dieđihangáibáđusat čuvvot stáhta Ekonomiija njuolggadusain ja jahkásaš juolludančállagiin.

§ 8 Fápmuibidjan

Njuolggadusat leat fámus das rájis go Ođasmahttin-, hálddahus- ja girkodepartementa mearreda.